

周易本義註

周易本義註卷之五

新會 胡 方 大靈撰

嶺南遺書

繫辭上傳

第一章

此章與下章皆言作易學易之事但此章言先天卦畫與學之大體下章言後天詞占與學之條目

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地成形變化見矣

天地古今之事物一陰一陽盡之矣然此陰陽也有對待之體焉有附麗之處焉有分別之性焉其處有當否其性有優劣焉且陰陽之中又有陰陽焉若此者皆易中所有而非宇宙所本無也易豈妄作者哉天尊地卑者陰陽既分兩邊不相混雜也然後陰陽之體定矣以清虛爲體故能尊以重濁爲體故能卑言尊卑猶

言清虛重濁也故是分陰分陽處形氣俱有清虛重濁者天尊地卑猶云有尊而爲天者有卑而爲地者者日月星辰此卽是變化而復有往來旋運形者山川動植此卽是變化而復有吐納生成

是故剛柔相摩八卦相盪

上節言易本造化而作此三節言易作而造化在其中此節言易作下二節言造化在其中非剛柔無以象陰陽非摩盪無以象陰陽之高卑動靜等故作易不能已于此剛柔卽奇偶

鼓之以雷霆潤之以風雨日月運行一寒一暑

以下二節言摩盪而易之變化備于天地間之成象成形者莫不在其中見易之包舉無遺欲求理者不須求之易外也聖人仰觀俯察見一切事物不外一陰一陽之變化故寫一陰一陽之變化而一切事物畢舉矣雷霆是聲之屬風雨是質之屬運行是氣之屬而小寒暑是氣之屬而大日月是日月而日月之運行則是晝夜重運行二字自復至乾爲陽息自姤至坤爲陰長

乾道成男坤道成女

乾知大始坤作成物

此以下示人學易之要學者須學天地而天地在易則學天地者學易而已學易有要學乾坤而已學乾坤有要學易而已學易簡而已學易簡而外易簡此二節推明易之理不外易簡此二節先括易以乾坤而由乾坤推出始成下節又由始成氣有精粗則其所以爲始成易簡者不同而皆是始成易簡則同也通章文勢於此處分上下截承上截轉下口氣似云天地卽易易卽天地故學易卽學天地矣而學易者何學乎易括于剛柔則學者學乾坤而已男女成于乾坤則知乾坤者知男女而已男女知始作成者也而男女是得乾坤之道者則乾坤之道物之所由以知始作成是也易之成象者人已非象不能學易之成形者人已非形不能學其能學而待學者易中形象內之理也成男之中有道焉知始而易是也成女事之中有道焉作成而簡是也上節言物此二節言物之機趣意是其所以然此卽男女之乾坤以乾坤之機趣意是其所以然此卽男女之乾坤以乾坤之一切乾坤二字卽當理之名始成易簡其實明一切乾坤之意是以此推之可知在在之乾坤皆如人物必有始有始則有知之者此是乾人物必有

周易本義註卷五

1

南ヶ莊堂校刊

物有物必有成之者此是坤此節結語口氣猶云以
此觀之則能作成而不能知始者失其乾矣能知始而
不能作成者失其坤矣

乾以易知坤以簡能

承上節轉下口氣似云而乾坤又不但知始作成卽是
也合乾與坤總是氣之一動但一回動只是初頭用
力後節便不用力故分出乾坤來設使一動不再動
則坤後無乾一動之度短則乾後無坤健而動者用
力而起順而靜者不用力而往健而動則有始極健
而動則始易順而靜則有成極順而靜則成簡健而
動處便是乾非乾是一物而又有健動之能也下句做
此前動健動者從時理而不已順靜者從陽氣而不爲
俱化而歸于無則後有感不能動矣所以易者無此二
誠靜矣此動之初已有成理矣使有別物之奪而要改易
此理或有別物之參而要增減此理則便有爲而不能
至能輕易其事則其事不得違心矣此坤所以統於
也乾

易則易知簡則易從易知則有親易從則有功有親則可久有功則可大可久則賢人之德可大則賢人之業

以下方言人所以學易之道承上轉文似云易不外始成易簡如此然則學易者當如何其唯由勉強求得下節自然已得以至於自然而已此節勉強求得下節自然已得易卽忠簡卽恕天命之心有感必動不能動者非天命之心也人安能知反是則易知率性之事循易之動他有動者非率性之事也人安能從反是則易從二向似指示人于易知易從求易簡學易在致未發之中學簡在致已發之和易就心言心不能強倣乎人人亦不能有與于已故只可相知簡是就事言事能強倣乎人人能有與于已故可相從易知則有親四句又言易簡學之易成以勉人學可久非憑人自信以人可驗已性之真以已性之真得可久也聖賢率性之事至于育萬物贊天地亦要有人分任方成功故以易從爲有功可久二句又言不待已得卽學時已可以貴以勉人學賢兼易簡而又久大說理尊則比一切理爲聖久大則尊理之不久大者又不如也德體也不分大小只分久暫業用也偏全不肯定故有大小賢人未爲成人也

易簡而天下之理得矣天下之理得而成位乎其中矣

此言學成之候已前是學爲易簡至此則居然易簡不待學也學易簡則易簡猶與我爲二二未是得且恐有學疎時則天下之理未盡得也得字一層天下得一層此由上節事達于一閒而至于神聖時也

第二章

旨見後註

聖人設卦觀象繫辭焉而明吉凶

此二節言易所以有詞占此本所以爲詞然有下節事則併所以爲占矣此聖人指文周設陳也觀象者觀其何所像兼陰陽內上下比應承乘言

剛柔相推而生變化

此言上節之詞所以卽爲占此以著求卦之事自此而得卦則詞卽爲占矣聖人本將教人以此而以其詞爲占故係詞眾人得聖人教以此故以此求卦所以註日聖人所以云云者也平居泛觀眾理或于一理有

未明臨事專觀一理反于眾理有可通心用于多與用
于少之有難易也故君子亦須更玩占至眾人心非臨
事不誠則玩占益得力矣剛柔故能似物變化故能
盡揲蓍所值不離書中之卦爻故曰卦爻然書中之
卦爻陰只是陰陽只是陽唯揲蓍所得之陰陽則有老
少之不同故同值一卦爻而有變化推盪者有人以
老數得乾初九則推去陽而陰盪其上遂成姤卦又有
人以少數得乾初九則又推去姤之陰而盪以陽還成
乾卦也有變則不變老對之亦爲變矣陰陽原是相
推所成則卦爻亦原是相推所成教人以此求卦溯易
之本求之非于書外有所增事也

是故吉凶者失得之象也悔吝者憂虞之象也

此言係詞之該而切言詞而占卽在其中
虞是切偏言失得憂虞之該言失得憂
一父一卦而子失得亦該也謂卦爻有人事失得憂
虞之象而吉凶悔吝因之係所以謂之觀象係詞
虞只是將凶未凶之時悔者于此轉吝者于此遂
吝恥辱也趨凶之事不舍是辱趨凶之愚亦是辱

變化者進退之象也剛柔者晝夜之象也六爻之動三極

之道也

此言觀象係詞所以能于人事該切之故。變化剛柔本象三極之道故卦爻是剛柔變化所成則觀象係詞卽言三極之道三極皆以進退爲始以剛柔爲終故進退晝夜之象卽三極之道之象而所以象得三極之道盡者以卦有六爻也。剛柔見天物萬物之統六爻見天地萬物之分動卽變化兼方變化與變化之既成言變化剛柔是揲蓍所得之卦爻而不離所設而觀之象聖人觀象而係之詞卽觀變化剛柔而係之詞也而變化剛柔是三極之道則觀變化剛柔而係之詞卽觀三極之道而係之詞也此所以該而切。

是故君子所居而安者易之序也所樂而玩者爻之辭也

承上口氣似云在書則爲象在蓍則爲變詞以象起卽以變起也象以詞明卽變以占明也而其關於人事深切該備如此故盡人道之君子必得力于此焉。是故二字統旨兩節此言君子有親易之本體是未見易時事而下節方言學易之工夫體無私欲者則悅理義凡事居乎理卽是居易之序凡事玩乎理卽是玩易之詞與下節實言易之詞變不同言詞卽統變雖不學易亦能得理而居之玩之然不如求于易之易

而無遺故一見易卽如下節所云爲居安故樂玩玩總因居起欲知以爲行地也序謂大小輕重先後本類未之

是故君子居則觀其象而玩其辭動則觀其變而玩其占是以自天祐之吉无不利

承上口氣似云唯其有親易之本體故見易則篤好而力學之觀象玩詞觀變玩占總是上節玩詞一義皆致知也居之志在此前居之實在此後觀變是臨事加審卽大學之慮自天苟言行無不善卽上章久大理得之目也

第三章

此勉人信從卦爻詞之意筮者卦爻出自鬼神在後詞出自人在先或疑詞未必是卦爻之意不知此理無神人先後之間故詞于卦爻深切著明如此

彖者言乎象者也爻者言乎變者也

此節言卦詞與爻詞不同例以言象者言變則汎以言變者言象則支筮得六爻皆不動則占彖筮得有動爻則占爻三畫始成象例見說卦象故卦稱象爻言變如只是一乾龍而在初以及在上各爲一時義是一象之變爲眾象也言乎是深切著明之意

吉凶者言乎其失得也悔吝者言乎其小疵也无咎者善補過也

此節言此卦爻與彼卦爻詞又不同例末句善字上有言乎字省文

是故列貴賤者存乎位齊小大者存乎卦辯吉凶者存乎

二節言詞之爲功于人者大詞含畫中而人不能見後世聖人拈出而後畫之意行于人明述之功每大于聖作皆此類也是故二字口氣似云由是觀之故詞與卦爻蓋並不可偏無者也有貴賤大小而後吉凶悔吝无咎有所據以取信有吉凶悔吝无咎而後貴賤大小有所宣而不隱也存乎二字是不可無之意有

以上爲貴如家人之上父是也先後之分也有以中爲貴如家人之五君是也主輔之權也有以內爲貴如泰之內君子是也親疎之勢也 大小物也貴賤時地也以是物處是時地則吉凶悔吝无咎生矣 父之大小亦從卦定陽卦之陰亦陽中之陰陰卦之陽亦陰中之陽也 列齊辨言易爲人列齊辨 物定時物不齊而定則齊故以定爲齊

憂悔吝者存乎介震无咎者存乎悔

憂震言易使人憂震也 存乎介存乎悔謂存乎因其介悔而加之悔吝无咎之詞 悔吝之詞所以能使應得悔吝之人 憂者以此悔吝之詞加諸其小疵也假惡已成而後加以悔吝則小疵者自謂未至此而自安矣 惡未動而加以悔吝則小疵者又謂已過此而自棄矣 憂者憂凶

是故卦有小大辭有險易辭也者各指其所之

此原聖人係詞爲有功於人而起以見有功於人之無疑也 是故口氣似云及物之功在詞如是故聖人不能已于詞也 有險易各指所之皆見不憚煩之意

第四章

此章言學易之極
致是聖人之學也

易與天地準故能彌綸天地之道

此節言聖人學易之始事 以下學易是于易中學天地而其始則先意中以天地之道安置在易內而後向易學之也 此節是以議論代紀事之文蓋提出其事在言前而從而議論之也 言前是聖人以易彌綸天地之道詞面是論以易彌綸不錯 以易彌綸而易果能彌綸是不錯與天地準則推明所以能彌綸之由也 口氣似云聖人學易之始則先以易彌綸天地之道矣而果能彌綸也何也 蓋易與天地準故也 易與天地準是將易與天地兩邊看天地邊有此道易邊亦有此道也是二之一彌綸天地之道是單就易一邊看將易之道當了天地之道也是一而二之 強者以易之體統盡天地之體統是天地之體統包舉在此也 細者以易之節目盡天地之節目是天地之節目條析在此也 以天地安置在易中則易收納天地在其中矣與下文以易收納天地于身不同 聖人于二三端處悟得天地之道其體統不外陰陽其節目不外陰陽之交

易變易又見易正是如此干是信得天地之道在易中此卽安置天地在易中也此是虛想之事與下文學時實遇不同

仰以觀於天文俯以察於地理是故知幽明之故原始反終故知死生之說精氣爲物游魂爲變是故知鬼神之情狀

上節言天地之道盡在易此以下言聖人學易盡學天地之道此節以學易知盡天地之道首二句猶云格物是故以下猶云物格仰以俯以猶以仰以俯觀察者觀察其陰陽也陰陽有對待相禪交別一氣二氣觀察有不到未可謂能觀察下面無不知是觀察無不到之效也幽明是對待之陰陽始終是流行之陰陽物變是陰陽之交別陰陽皆有始可原有終可反死生是一氣之陰陽鬼神是二氣之陰陽二氣之交分之卽各一氣之始二氣之終別分之卽各一氣之終

與天地相似故不違知周乎萬物而道濟天下故不過旁

行而不流樂天知命故不憂安土敦乎仁故能愛

此節言以學易得盡天地之道。以得之已者卽人之性也。性之行與天地之得此理同矣。至命則性無不盡。與天地之得此理益無不同矣。性本能爲命。盡性大槩言之至命推極言之也。非有二事。致虛以似之。則性盡矣。并其體言之矣。故此二節亦是從易學之者。與天地相似。故不違。言其不違。出于自然。別性于學也。謂天地之理實得于已。不違。謂不違。天地之理兼知行言。此句虛下文方言其實。下文皆言不違而相似。自見上面非相似。不能不違至此也。前之所知。知而弗去。則爲此之智。學知之。知卽智性之用。但蔽未去。則體未復。而所知有存亡行止。萬物謂萬物之理。智之過者穿鑿。索隱必不可見。諸行事可見。諸行事則非智之過矣。智周道濟。言智仁能盡道之常。旁行不流。言智仁能盡道之變。旁行者。行以智奇也。不流言智。以仁奇而實正也。樂天知命。是知及于幽微。安土敦仁。是仁近於自然。智合看。而不可以人爲。故有精粗。無安勉。仁分看。而可以人爲。故有安勉。無精粗。樂天者。知天之樂。而以樂視之也。是言知之透。不是言能循天者。

天理者素位之事既樂乎此則不樂乎出位之事矣
不樂乎出位之事又何至欲去此位得彼位而憂耶
知命之常則又有以自信而不憂知命之變則又有以
自分而不憂天理之事有自苦時然知其爲天理則
有是非以易苦樂而不覺爲苦如夷齊之餓是也
土者其仁隨處不改甯可困窮不可稍害人以自免也
安是仁安不待離去稍不安便不是敦不待處
處不安但一處不安便不是敦安土正敦之極也

範圍天地之化而不過曲成萬物而不遺通乎晝夜之道 而知故神無方而易無體

此言至命之事卽本上事進而廣言之也
學知時可及然比人事益疎遠非智仁之至不能知之
弗去行之無餘也天之所爲謂之命化物之類是天
之所爲而非人之所能造也故曰命能贊勸之是有能有
事到命上故曰至命人用物以爲人處亦算人事唯
正爲物而爲處方算成物晝夜句是伸明上二句事
是无方體之証上二句皆兼知行此句言知以統行從
化物之是晝夜看出範圍曲成之是通知晝夜取陰
陽迭運不窮非僅取兩有通亦是與無窮非但不偏于
陰陽之謂晝夜是命之無方體通知是心與命無方

體知幽明等之知是知新之知此知是藏往之智虛故圓體圓故用變神圓也易變也體不可寫書只寫得用故止名易然唯神故易則易傳而神在其中矣神易是道在天地是氣之爲道在聖人是心之爲道天地之氣時而作陽之情狀時而作陰之情狀是無形體也其主宰不落于陰亦不落于陽故能然是無方所也知此是聖人用易書以爲神易也註云而後可云云謂書無迹事有貌神易在書人不能見聖人學來措之爲實事而後人能見之也此句詞面以聖人証易意實言聖人是學易得來唯學易得來者因之可以見易言可以見易卽言是學易得來者也

第五章

此章離易而言道欲使學者知道然後能見道于易也此二章總申道盡在易之意易其至矣乎章則申聖人用易之意也

一陰一陽之謂道

道者天地事物必由之理陰陽是天地事物一陰一陽是陰陽之理卽天地事物之理道先陰陽而有有

陰陽而後此
道有安頓處

繼之者善也成之者性也

此二節卽人上指道謂人初是一陰一陽以爲道及其後累于見不見而後不能然耳。繼成二句本欲就氣指點一陰一陽而卻以理之繼成爲言者蓋謂理氣不相離氣有行止故理有行止言理之行止卽一氣之行止也。之字卽指一陰一陽之道繼者天地已有此道復造爲人之此道如一事已畢又繼爲一事也。成者造人之此道成也。善字依註說卽下文仁字仁似體善似用可欲之謂善可欲處是仁之發出來者也。事之善惡動而後見故行時言善止時言性性只是人之定稟未著其善惡也。繼是一陽成是一陰繼雖天之事而天者人之始故卽言人之初以一陰一陽爲道天自成時是一陰繼自一陰而一陽也。猶云繼時則此道流示其可欲而爲善成時則此道凝定于人中而爲性人卽此氣之分此氣不能外一陰一陽以爲道故分合皆然也。

君子之道鮮矣

有理而後有事物仁者雖謂之仁而已未嘗无靜知者雖謂之知而已未嘗无動百姓雖不知而日用則亦有動靜也故此節无害于成性之說同此氣之偏但成性之初未有物感故雖偏不爲累有形以後物感由偏而入斯爲累矣見之之字卽指道所見之仁智原是道之偏非道外物也其見之也見其偏而卽謂之是偏也仁智百姓之陰陽是對待之陰陽前後一陰一陽皆此陰陽之流行也質生於道靈乃通也

顯諸仁藏諸用鼓萬物而不與聖人同憂盛德大業至矣哉

此二節卽天地上指道顯藏二句言一陰一陽已畢以下又言一陰一陽之明而確也多則明誠則確盛大見多盛大出于無心見誠繼善成性皆天地生人之所爲此己可見天地之一陰一陽然其事猶微不若觀于歲功生物之明也顯是天地之道顯藏是天地之道藏天地是已成對待陰陽之質乃道之渣滓其中有陰一陽也天地方爲仁時則天地之道可見故曰顯方爲

用時則天地之道不可見故日藏。造化之功卽生物成物機緘皆握多于少含動于靜之物用謂機緘之妙者謂保合太和時正握多于少含動于靜也。妙卽指此非此又有妙處猶功卽指造化之迹。憂者慮所以使物出入也一憂出一憂入便是聖人之一陰一陽驗亦未真無憂則道之真驗盛大則道之明驗也。道先有在天地之間氣之无心者氣自順道有心者以氣順道然旣有心則无以見道之不是心爲也。盛大之至兼頂鼓萬物與无憂鼓萬物是盛大之至无憂是盛大所以然之至事同則以勞逸分至次逸者有有餘于此之意故量似過於勞者也。智仁未盛大亦未兼盛大聖人亦兼且盛大但少遜天地之鼓萬物且有憂則遜天地之逸故可見至者莫若天地。同是一氣何以天地无心聖人有心蓋氣卽有心但氣靜時心亦靜氣動時心亦動靜不見有動方見有地氣在天地尚靜及人生而爲人乃動矣。天地之鼓物何嘗不是動此如人之寐中血脈喘息未嘗不流行而終是靜也。聖人之順道心所爲而所順之道非心所爲

富有之謂大業日新之謂盛德

此節只上節釋義不另爲段落
何以猶謂之大業以富有必發爲大業故謂之大業也
顯仁是德之發矣何以猶謂之盛德以日新必本于盛

德故謂之盛德也
故富有後有日新富有謂之大業日新
謂之盛德卽此可見一陰一陽之義

生生之謂易

承上四節而結言道之是易
統于人上四節將天地與人槩觀之眞足見其道之不外一陰一陽矣一陰一陽生生不已所以謂之易也
易之爲書乃載此道者故易之名亦不易焉

成象之謂乾效法之謂坤

此下三節取易者玩出神來
謂之易猶未盡其妙也猶有可就生生之迹玩索而得者焉不獨人之貴天地之大也雖一事一物之微其一陰一陽之生生皆可得而覩也
此二節與下論淩潤之謂第二段相似是一事而再舉之詞但末段舉來是揚出其易之狀此舉來是揚出其神之微
極數通變與前面繼成總天地
顯仁邊事是陽中之陰陽也

極數知來之謂占通變之謂事

事之失可轉爲得危可轉爲安是變也行事者使可轉爲得者竟轉爲得使可轉爲安者竟轉爲安是通其變也變卽所謂來者

通者疏而行之也

陰陽不測之謂神

結明易者卽神無體之謂易无方之謂神然唯體无方故用无體今核其用果无體則體之无方明矣通

結口氣似云道不外于一陰一陽之易與神如此故易寫一陰一陽卽神易盡在其中而聖人可于易得易與

神也

第六章

此章就易言道使學者就易觀道而後真見道之在易也

夫易廣矣大矣以言乎遠則不禦以言乎邇則靜而正以言乎天地之間則備矣

此節虛言備道次節推明所以備道末節實指其道
此節首句統言以下析言廣大是易中事物道理之
度量三節廣大只是一義唯次節是離易懸起言者
與後就易言者不同耳此只言事物道理廣大未知
是甚事物道理至末節方指明此廣大之事物道理卽
一天地也廣謂多蘊多厯之闊大謂外體張覽之偉
陽一而實陰統于陽故廣必會爲大陰二而虛陽麗
于陰故大必分爲廣下三句正申明廣大合遠邇天
地之間渾淪看則大閱厯之則廣矣遠邇兼時地言
遠邇無定在如天地以天地爲邇人物以人物爲邇
古以今爲遠今以古爲遠是也靜正承遠者言謂遠
外又另自有邇不須將遠者假借融通而後有邇亦邇
者另自爲邇不曾假借融通以爲遠也來去皆是動
靜者無來去也質實方是正正者至質實也必說靜
正者恐人疑卦爻有限不能詳盡也不知剛柔相摩八
卦相錯天地古今總此一局輪迴不已耳靜正二字
已井遠言之而天地之間亦可推矣
遠邇偏舉兩頭天地之間悉舉中央

夫乾其靜也專其動也直是以大生焉夫坤其靜也翕其
動也闢是以廣生焉

此節推明乾坤之所以廣大以申明易之所以廣大是以二句只言乾坤之所以廣大非言易之廣大自乾坤生也承上轉入似云不禦靜正皆備合之所謂廣大也然易象乾坤耳何以能廣大如此蓋易象乾坤而乾坤固能廣大者也易只象乾坤者上節卽隱言易象天地四時日月至德故必推明乾坤能爲天地四時日月至德而後易之能象天地四時日月至德明也遠邇天地之間只廣大之目言廣大則遠邇天地之間在其中廣大之實合之則爲天地析之則爲四時日月至德乾坤卽二氣二氣皆以靜且專翕而能動且直闢所以成象成形敷衍無窮而此理亦隨之敷衍無窮下文天地四時日月卽形象至德卽此理也一而實者不開以納物徹裏皆自己二而虛者開以納物中央無自己也廣大卽暗指天地故註以天地釋之凡物氣熬成質而氣復周流其中凡事意凝爲迹而意復貫注其中皆天包地外氣行地中之義也槩言之則乾是一動坤是一靜細言之則動中又分動靜靜中又分動靜乾之動時尙有坤之靜時坤之動時已是乾之靜時是以造化無息不然則乾坤有俱靜時便無物矣讓陽極也陽極則陰生故動直者行之貌也闢者形之敷也

廣大配天地變通配四時陰陽之義配日月易簡之善配

至德

此節承上節推明易能廣大應首節覆言而結之承
上文轉入似云乾坤能廣大如此故易象乾坤卽廣大
之象也 廣大配天地猶云易之廣大卽天地之廣大
乾坤之動合之則爲天地析之則爲四時日月天地
四時日月所具之理則爲至德故易象乾坤卽象得天
地四時日月至德也 奏合眾陰陽是天地將陰陽之
流行者分析之是四時將陰陽之對待者分析之是日
月至德則陰陽所具之理也 奏合眾畫是廣大畫前之
推盪是變通畫後之散布是陰陽畫中所含之吉凶悔
吝是易簡 自此之彼爲變變已成爲通已成則彼此
通爲一也 陰陽易簡雖就詞言而詞只發象之蘊則
猶之象耳 註云所言陰陽之說非判論陰陽之詞乃
稱謂陰陽之語也 義如剛柔明暗大小強弱舒慘善
惡之類皆陰陽中理必如此者故曰義猶一句書其義
則不止一句也 日月是陰陽成象之一端舉以該凡
成形成象者非專言日用也 卦爻有不易簡者聖人
正以凶吝之詞發明其不易簡然由其爲易簡之反可
以知易簡則皆示人以易簡者矣 盈宇宙間總一乾

變坤之動乾坤之動初甚易簡其不易簡者所乘之時位
變失之也 首句與首節同首節遠通三句是將此變
通三句析言其處此節變通三句是將首節遠邇三句
析言其物 知盡天地日月四時至德是無餘知事盡
天地四時日月至德是無餘事故易可以崇德廣業
天地四時日月是必然之物至德是當然之理知其必
然則能爲之防知其當然則能立之極知爲之防立之
極是崇德已爲之防立之極是廣業此節所謂窮理盡
性至 命也

第七章

此章卽申言與天地準章之意彼詳言此約言也
知崇卽窮理及盡智之性禮卑卽盡仁之性而至命
既盡性之極致是至命亦卽在崇卑中也 未知時
致知是窮理旣知後致廣大以致不去卽是盡智性
前節以工夫言後節以效驗言前節是言崇德廣
業後節是言德崇業廣也 自成性說起是聖人之
學與君子之玩 詞與君子之玩占不同

子曰易其至矣乎夫易聖人所以崇德而廣業也知崇禮

周易大傳卷第

卑崇效天卑法地

至謂爲道理之盡頭處卽崇廣之極更無道理出其外者也所以能爲崇廣之資夫易至末總解首句知崇三句解所以崇德句理盡于易虛懸之爲理麗于事則爲禮知得易盡便是知盡了理行得易盡便是行盡了禮崇德卽崇智廣業卽廣仁智無爲隱于心故專言德仁有爲成于行故兼言業業德之發非離德也識藏往不去故以全體之日積言崇情隨感而化故以逐節之篤實言卑理受于己故崇者崇于己事受于世故卑者廣于世知崇句承上似云聖人何以能以易崇德而廣業乎蓋學易卽窮理循禮而知崇禮卑也

天地設位而易行乎其中矣成性存道義之門

此節言效驗至于效成而後見易之至也承上似云使聖人以易崇德廣業而德不崇業不廣則易不足以爲至矣而豈有是理哉非崇德廣業工夫則以之崇德廣業而德業未必崇廣成性二句猶云學易真是效存工夫下文成性句正承此言勿說錯學者身分

天法地效天法地則真。是崇德工夫而德斷可崇業斷
既。有易則聖人但學易便是不待增設矣。成性存存
是承上節言之非進一層事猶云如是成性存存也。
聖人之性本是已比他人性堅脆不同當不存之亦
存不則稍存之亦已存然縱爲過危之論謂非極存之
功不存而如上文所云亦是極存之之功矣。道義
謂身有道義知得道義行得道義是爲身有道義門則
所以有道義之由來也。聖人窮理循禮是順導其智
仁之用而智仁之用常行則心之蔽累無從而人便是
存性至于性常存則智仁
之用又常行便是道義矣。

第八章

首二節原卦爻所以有用四節正言卦爻之用五節
發擬之凡爲人脩言行之資者卦爻之用也象物
宜行典禮所以爲人脩言行之資也

聖人有以見天下之蹟而擬諸其形容象其物宜是故謂
之象

此以畫言註云卦之象卽兼爻在合六畫爲卦分之卽六爻也聖人指伏羲心虛而靈是聖人所以能見能擬能象者有以之有指有此下節亦然後而擬議只擬議詞而詞緣象而係詞於人該切故足爲人言行之資象能該切故詞能該切詞之用卽象之用故兼象言之也蹟指物形氣性才皆物形容之真處乃恰可是此物處謂之如此乃宜所謂物宜如擬諸天之行而見健是其宜于是畫一而實之畫以象其物宜聖人有以見天下之動而觀其會通以行其典禮繫辭焉以斷其吉凶是故謂之爻

此以詞言正文言爻卽兼彖象亦總括爻之義也聖人指文周動指事作爲言語皆事觀其會者初觀其理之大段也又隨觀之則大段中又有衆理相牽相礙于相牽相礙中各看出一理之所以恰可處則一理可以獨行如一族中一筋自有一筋之虛地可以旋轉是謂觀其通如民初看只是宜愛徐看見愛之之法有患无威徐又看見惠以民殘時而宜威以民玩時而宜則威惠不相背而可行是也族者眾筋聚作一團虛者各筋有間罅處

言天下之至蹟而不可惡也言天下之至動而不可亂也

此結明上二節之意不切于人則雖善不能資人不善則雖切于人亦不能資人今象切于人詞本象而係又爲至善此所以有爲人資之用也言蹟指象象立時卽命以名首節象該名言蹟則易汎汎則一言亦可厭皆象物宜則無汎則無羨餘安得厭動字指事此動字指理事變動理因之亦變動故皆曰動動則易雜雜則有外入而混之者不覺皆行典禮則純一純一則不容好安得亂二句總結皆是象物宜行典禮是切于物而又至善也

擬之而後言議之而後動擬議以成其變化

此節口氣似云象爻是象物宜行典禮如此故有其用也其用在爲人言行之資蓋人言行所當必擬議而擬議之則變化成者也不不是爲人言行之資則言行不必擬議之擬議之亦無成今言行必須擬議擬議則有成以其足爲言行之資也是意言卦爻足爲人言行之資而以測詞托出之疑是心揣摩之議是心討論之總玩索之意也擬議雖是玩索詞占中之義蘊然詞生於象變不辨象變無從得曉詞占故觀象觀變皆擬

議詞占

工夫也

在書則爲象詞筮時則爲變占首節

言象卽該變次節

言詞卽該占二句言人必當擬議

言擬議不是徒勞是所以成其言動卽言擬議則有成

言擬議也

變化卽言動易言動以變化言無不可成也二言

動多乃見是變化

言動了而不善亦不算成

鳴鶴在陰其子和之我有好爵吾與爾靡之子曰君子居其室出其言善則千里之外應之况其邇者乎居其室出其言不善則千里之外違之况其邇者乎言出乎身加乎民行發乎邇見乎遠言行君子之樞機樞機之發榮辱之主也言行君子之所以動天地也可不慎乎

此以下皆孔子身爲擬議以作學者榜樣口氣似云如何是擬議如遇此爻則口心思維曰如此云云此所謂擬議也千里應一段是爻言中意千里違一段是父言外意言出乎身以下又覆思明其言之確然可不慎乎是爻言後意樞機是運內物至外之器非直比言行爲動外物之具也已之善惡以言行故及于物

善惡及于物而後有榮辱之報故樞機之發爲榮辱之主應違卽榮辱應違有深淺自无怨惡至富貴皆應自然惡至困亡皆違人之盡量卽是天地

同人先號咷而後笑子曰君子之道或出或處或默或語二人同心其利斷金同心之言其臭如蘭

君子之道云云總
是異不害同之意

初六藉用白茅无咎子曰苟錯諸地而可矣藉之用茅何咎之有慎之至也夫茅之爲物薄而用可重也慎斯術也以往其无所失矣

苟錯諸地云云總置身當擇其處之意鶴鳴節以人之應違見當慎此節以已之得失見當慎慎言行是此身之地慎之極是此身之茅有此節之慎而後有言行之善茅非薄薄云者以有地在則所加安無多也用以得无咎是重此句申明藉茅所以爲慎之至可重也以上言錯物以下言錯身斯術卽慎之至

慎又操持此至慎使無寬弛
也連鶴鳴節看來慎有三層

勞謙君子有終吉子曰勞而不伐有功而不德厚之至也語以其功下人者也德言盛禮言恭謙也者致恭以存其位者也

此節總持滿貴謙之意不伐二句況釋勞謙二字未粘九三身上語以句方釋以勞謙稱九三唯恐形人之短忠厚之謂也此猶知其勞而不忍伐爲人如爲己仁厚之謂也此併忘其勞而無可伐方事之謂勞事成有利子人之謂功功從勞出勞功之由故爻以勞統功孔子以功統勞德言盛以下釋有終吉口氣似云何云有終吉蓋德言盛云云也言凡人德期於盛禮則期于恭蓋恭乃所以存其位也而今所云謙也正致恭以存其位者也故云有終吉也

亢龍有悔子曰貴而无位高而无民賢人在下位而无輔是以動而有悔也

此節正與上節反對
是處盛衰盈之意

不出戶庭无咎子曰亂之所生也則言語以爲階君不密則失臣臣不密則失身幾事不密則害成是以君子慎密而不出也

鶴鳴白茅二節言言行要善此節言善亦須以時發也
鶴鳴二節是循事物之理此是循時位之理鶴鳴二節就修己言
此就爲人言

子曰作易者其知盜乎易曰負且乘致寇至負也者小人之事也乘也者君子之器也小人而乘君子之器盜思奪之矣上慢下暴盜思伐之矣慢藏誨盜冶容誨淫易曰負且乘致寇至盜之招也

勢謙亢龍二節言本分不可盡居此節言非分不可少貪

第九章

此章專言卜筮之事。聖人之用易，不待卜筮而易之。功及凡民，則必以卜筮筮法。不尊不足以聳，凡民則易之功息矣。故聖人必詳言以尊之。前五節言筮法，用河圖之數。天一二節言河圖之數，大衍三節言筮用此數六節言筮法合兩卦爲一七節言筮法分一卦爲兩八節言筮法具變卦于正卦九節單言筮之功十節合言數筮之妙。

天一地二天三地四天五地六天七地八天九地十

此節是檢點河圖之數，多少奇偶，一二三四等字紀多少也。天地二字紀奇偶也。五以上先檢點內層，六以下復檢點外層。口氣似云此一也，而是奇則天而一也。餘倣此，其爲五行之數與四象之位數，節中皆未暇及，不得預說。

天數五，地數五，五位相得，而各有合。天數二十有五，地數三十，凡天地之數五十有五。此所以成變化而行鬼神也。

此節推明此數是五行之數 五行是五段事物今數亦五段已可想見是五行之數 五行是相得相合事物今數之位置亦相得相合益可想見是五行之數然此猶是五行之數規模大致耳一六二七三八四九五十乃其數之親切本體及稽相得相合者又是一六二七三八四九五十則爲五行之數無疑矣 必一三五七九順積之而後成二十有五今將天之五位左旋而察之乃是二三五七九順積則是二十五矣 必二四六八十順積之而後成三十今將地之五位亦左旋而察之乃是二四六八十順積則是三十矣 此自一而一三五七九順次彼自二而二四六八十順次則是相得者恰是一六與二七三八四九五十相合者恰是一與六二與七三與八四與九五與十矣 則眞是五行之數矣 所以見是五行之數總在此二句下一句只稽明確是二十一有五與三十耳二十五三十合則是五十五今積算之是五十五則前之見是一三五七九與二四六八十不錯矣 所以成變化行鬼神猶云是五行之數陰陽以此數布運宇宙中則變成鬼神行故曰所以成變化行鬼神 五行非一變一化則一化一變所成有陰有陽故有變有化陰陽有此參差之數故變化有五變化皆轉換之意然變是化之初屬輕細化是變之終屬粗重故陽言變陰言化以陽清陰濁則其轉換

之迹有隱顯也水是陽從消而初長陰從長而初消所成故是一之變所生六之化所成陽不長無水陰不消陽亦長不得餘倣此五行自其所以然言之則是變化自其已然言之則是鬼神陰陽之顯仁是伸而爲神陰陽之藏用是屈而爲鬼木神也火神極而含鬼也金鬼也水鬼極而含神也土前半神後半鬼也土中分五行兼陰陽而陽在先陰在後故亦以陽爲生數陰陽總一氣之動靜因動靜有消長遂有五行水靜始消而動始長靜多而動少也木動又長而已兆消靜又消而已兆長動顯而靜伏也火動始消而靜始長動多而靜少也土動消餘半靜長成半動靜均也金靜又長而已兆消動又消而已兆長靜顯而動伏也由動之靜有土爲間由靜之動則無者氣之性陽有餘陰不足動易長而難消則靜易消而難長也由是言之則木火中之動更多于金水之靜木火中之靜更少于金水之動至土之前半然後動與水之靜等少靜與水之動等多添土之後半而後金中之靜與木中之動等多金中之動與木中之靜等少也五行卽四片之說土前藏木火後舍金水仍是四片也此木是中央之土與四隅之土不同春夏之交是未後又于申上加此土也陽有餘陰不足木先透於冬火先透於春此土占于秋秋冬二季原不如春夏之全此土之後亦不如四季之長也

大衍之數五十其用四十有九分而爲二以象兩掛一以象三揲之以四以象四時歸奇於扱以象閏五歲再閏故再扱而後掛

以下方言筮法先見散之爲一二三四五六七八九十積之爲二十有五三十都包在五十中而變化鬼神之數卽不出其外故用之以衍天地人物之事著草適符五十之數則亦包五十之所包者在可以衍出變化鬼神然先知圖數故知蓍是如此所謂明于天地之道是興神物也此節只言用圖之五十而五十中包一切變化虛一兩三四時再閏等皆是變化則亦皆是圖中之數而爲兩爲三象四象閏皆是用圖數也衍布也大衍者大布天地人物之事也故揲蓍名大衍五十則先板定有平分之數在虛其一乃無此敝要圓而神則不得不如此故曰出于理勢之自然四十九分之則又板定不平而人欲不平之意得附而行矣掛一者所以去此人之意如是而復不平乃鬼神之所爲也四十九去其一則一半應得二十四矣故以二十二求之而觀其于應得之數有餘不足也共爲一營之數是同宗共事者前奇不遽歸之小刻者兩揲之奇

周易本義註卷五

五

待後奇與齊歸也後奇亦不遽歸之小刻者會前奇與齊歸也以此見同宗共事之意故有初之法再而後掛謂一掛之後有再掛猶云一營有再掛也天氣須六十二箇月方還其本直之月如返而復往之象故天行以五歲爲一局而五歲中有兩閏筮以四營爲一局而四營有兩劫適似之天無迹須以日紀日繁多須以月紀以日紀天而以月紀之此是捷法然以三百六十日約紀天之一周而三百六十日實未足三百六十五度有奇以十二月約紀三百六十日而十二月實未足三百六十日則以十二月紀天之一歲終未合故又算出以六十月紀天之五歲而添兩月其中之法來月爲朔虛須補六日方與三百六十日數符日爲三百六十日正行三百六十度須補五日有奇方與天一周之度符是每歲須補十一日有奇合五歲該五十七日餘氣盈者天一周之三百六十五度有奇多于十二月之三百六十日也朔虛者月之十二朔少了日之三百六十周天六回也月行遲退後被日速去了所以不待得三十日便死盡所以有朔虛每閏月一半正月之支一半下月之支是以一半後補前之氣盈朔虛以一半預補後之氣盈朔虛一回天氣正之後積一年餘而上月之節氣半入于下月兩年足後便要間不閏則上月節氣全入下月各象字是無意而與之合

蓋天地間之變化無一不包在五十數中故任縱橫做出皆于天地間事必有所合也。五十歲再閏故再掛而後掛故字須善會亦謂數之在歷既使之如此故在筮亦使之如此非謂聖人因再閏而必作爲再掛以似之也。計三變之策時去初掛之一此一人之所知不使人得有與于數也。

乾之策二百一十有六 坤之策百四十有四 凡三百有六十當期之日

此言筮之用九六七八爲老少陰陽之數亦是用圖知圖以九六七八爲老少陰陽之數以一二三四之所連知之也。夫子見一二三四爲老少陰陽之象故見圖之連以九六七八爲老少陰陽之數亦見南北東西爲老少陰陽之位而後無疑于一二三四爲老少陰陽之象用圖者圖如是而列之聖人亦如是而命之無意相合非據圖而從之也。節中是言二老之策是九六見聖人以九六爲二老之數策是九六而以此策所得之爻爲二老是以九六爲二老之數也只言過揲之策非但言過揲之策也過揲之策如是則所餘之策是三奇三偶三奇三偶則亦是九六矣是言所餘過揲無非九六也。奇圓圍三陽用其全是三

三而九偶方而四陰用其半是三二而六故三奇三偶亦是九六也過揲之九六是著之體數所餘之九六是著之用數氣先截爲氣後截爲質氣時質少質時氣少一四爲老陽老陰之象以質之多少分也九六爲老陽老陰之數以氣之多少分也六以下是下一截其數莫少于六莫多于九故六爲老陰數九爲老陽數凡物惟胚胎時爲正體至形現時則向變而正體之數不全矣有老陰斯有老陽是老陽胚胎于老陰也有老陽方有老陰是老陰胚胎于老陽也故圓九不附于一而附于四六不附于四而附于一當期之日四字只作三百有六十五字言二篇之策合計之是三百六十也此句是合言之以再醒明是二百一十有六百四十有四字是申言文體二百一十有六百四十有四愈明則九六愈明矣總是聖人確以過揲之無非九而後以三奇爲老陽也

二篇之策萬有一千五百二十當萬物之數也

此會計全書二老之數合之如此則知分之如前節所計無疑矣二篇之卦爻在筮皆通可爲老少故可通以老者言之而少亦可例推以上見筮法述而不作非強妄之所爲所以起人之尊也

是故四營而成易十有八變而成卦

以上三節言筮法以下四節言筮法之所得
法全事之始終易是卦之始卦是筮之終
一變之事上二節言一爻之事此言大衍節事與上二
節事之回數十有八變而成卦則是三變成爻而一
爻于大衍節事三回爲之也十有八變而成卦則是六
爻而于上二節事六回用之也自四營計到十八變
是六十八回事見聖人教人于觀變玩占之先不
厭繁重如此則其欲人致慎于言行之意可見矣

八卦而小成

此言筮法之中事此是言一卦有兩象示觀玩者當
先明兩象而後合求一卦之象也一卦之象是兩卦
合而成之象兩卦惝恍悅則一卦之象不眞矣此又示人
觀玩之法當精詳也成卦當分小成看則小成當分三
爻看與反之得內卦當通外卦看得外卦當通內卦看
得內外卦一爻當兼三爻看又當通六卦看皆可推矣
萬物皆以三才爲體段一卦到三畫後四畫五畫不
成物象而積到六畫又不外成箇八卦故八卦已是成
了卦無可復成但只象得事物未象得事物之交在事物之象則方是小成耳

周易本義註卷五

引而伸之觸類而長之天下之能事畢矣

此二節言筮法之後事。筮得一卦則法終矣。而卦中
有動爻在焉。則是一卦事畢後。又有生他卦之事也。
一卦爲六十四卦者。一純靜者爲本卦。餘動者爲六十
三卦也。有不變。有全變。有一爻變。有二三四五爻變。
一二三四五六爻之變者。又有初二三四五上爻之異。
總之得六十四。引伸是從正卦取變卦。觸長是從變
卦又取變卦。變卦含在正卦中。未出似屈。今揭出來。
似牽屈者。而伸之然。正卦之有變。是變卦之又有變。
類也。觸是徹悟于正卦之有可引伸。長是倣而斷續其
引伸之事。亦是將含在中者。揭出來也。一人一事之
筮。只是從正得變。從變又得變。不能爲四千九十六卦。
以畢天下之能事也。能事畢。是盡萬人萬事之筮。言
一卦有正。有變。又有變。而變與又變。又爲他筮之正。則
變無窮矣。天下之事物。與事物之因革損益。皆二氣
之能事也。卦爻備。則事物之象立。而吉凶悔吝之理。含
其中。則當因革。當損益之理。亦含其中。是爲能事畢。

顯道神德行是故可與酬酢可與祐神矣

上三節言以筮得卦。此節言以筮得詞。既得詞。則象
明。占具而因占。而因革。損益以爲趨避。豈筮及人之功

也

詞就占得之詞言不指全書

詞兼象占現事物道

卽能事

天下事物皆二氣之變化必至于此吉凶悔吝

是事物之究竟必至于此者因革損益

是二氣之才性可以如此者此所謂理卽道也

事之得失神者惡可變爲善失可變爲得也

德者人之善惡行者疾速亦神之謂因人踴躍鼓舞故也按下章則本文神

字未得入此因得卦爻而得

詞則道顯矣而卦爻從筮得則詞亦從筮得而人以鬼神之告而信從而不敢

懈怠而有以神人之德行矣

謂數既以詞顯道而又有以數之所顯神德行也筮數之行也言數卽言筮耳

人有所迷惑而求解于筮

筮能開其迷決其疑是有以答人之意也故曰酬酢行者知之真之效能顯道

未能神德行猶之迷有未開

疑有未決也故合顯神方是酬酢

酬譬人之求醉

譬人之答人之德行原二氣所含之變化變化卽鬼神德行不神是鬼神有所滯

而不行故能神

德行是能祐神

子曰知變化之道者其知神之所爲乎

此節贊數法之妙以致人之尊筮也

筮得卦詞而不尊則觀玩粗而信從解而可以祐神者不必眞能祐神

矣人之所尊莫過于神故明其神以尊之
之動紀之則爲數實行于天地之間爲數象行于蓍之
中爲法數神之實法神之象也 天地之變化人生其
後固非人所能爲而著之分兩人欲爲之多少亦不能
也非人之所爲則不得不歸之神矣 神充滿宇宙則
體大而難勝神泯絕形聲則體微而不知所以勝故人
不得不尊神 恐人疑法爲人爲而襄故歸之神恐獨
言法爲神爲而晦故配數言之 數以非人爲爲神人
之所明也今法與之並言則以其非人爲之意亦明矣
此神與上節神字有別上節神字是二氣之動不離二
氣此神字是使二氣動者又在二氣之上大虛不能无
氣有氣不能无動非實有物使之而虛氣既莫之爲則
不得不謂有爲之者而沿其生之之用歸以不測之體
于是強名之日神

此章承上章顯道神德行而申言之見所謂顯者極
顯之致所謂神者極神之致也 上章酬酢佑神是
顯神之功用此精變神是顯神之體段唯其顯神是
如是之顯神故可以酬酢佑神也 首節虛提有爲

第十章

三節實疏

將有爲三節皆從顯神之極致看出其

有精變神之道

是言以顯神之極致爲主非正言精

變神有爲節言顯之密參伍節言

神之該而捷無思

節言顯神之誠皆顯神之極致也

極深二節覆斷

上文三節末節應首節虛繖

首節言易有精變神

之道以其詞占象變之可尙見之

有爲三節言易之

詞占象變之可尙在通志成務不疾而速不行而至

如此可見有精變神之道極深二節言易確有精變

神之道故能通志成務不疾而速不行而至如此末

節言易以有精變神之道而能通志成務不疾而速

不行而至故謂

有精變神之道

易有聖人之道四焉以言者尙其辭以動者尙其變以制器者尙其象以卜筮者尙其占

易主卜筮言著不言書四總一筮分爲四段事一易可
分之爲四而四者皆有聖人之道非易有聖人之四道
聖人之道三而易之四者分有其二合有其一以
言前似云何謂易之四者詞變象占是也尙其詞後似
云以詞之足尙而見詞之有聖人之道也餘句倣此
以言四句總以足尙虛含下文之事以用也尙先推

也謂先推此爲所用之具也然言人當尙不是言人皆尙筮之事有變有算然算只所以明變非有加于變故統名以變先論列事物之理則爲詞到後斷決狐疑之意則爲占都就筮時說變者象之未成象者變之已定詞占雖是書之所爲而今爲著所用則皆著之事也以言謂用一說以論議事物以動謂用法以發動事物之象出來尙變謂唯用此動得無窮動得真實義在變化者進退之象句以制器謂用一式以立成事物之體段于心目中尙象亦謂唯用此制得無窮真實象確是事物之象象之蹟能書事物之象故做之以命事物遂無窮而真實義在剛柔者晝夜之象二句人於事物有雖在身而不能辨其方類如陰陽善惡之屬者此如器之未成辨之使辨卽制器也卜筮猶云決疑以上皆卜筮中事而獨以決疑爲卜筮者到此而後卜筮之事體成事旨見也尙其占者以占告人明正而遇過也義在見天下之動觀會通以行其典禮觀玩有正取反取類取之法故象占皆於當人當事無漏

是以君子將有爲也將有行也問焉而以言其受命也如嚮无有遠近幽深遂知來物非天下之至精其孰能與於

此

承上總下轉文似云夫尙訶尙變尙象尙占何以可見易有聖人之道蓋詞變象占所以足尙之事非有聖人之道不能有其事也是以二字前似云自有人尙易而後見易足尙之事是以二字承尙其詞四句來謂君子知易之足尙故尙之爲是身外有所做出是用物之事行只身之運動是用身之事爲遠行近尙詞亦就筮時言問言四句只言尙詞之事而尙占在其中論明事理正所以求決疑之功故以言可統以卜筮先可以明理後乃可以決疑爲詞時足尙而後爲占時遯尙故以言之尙詞可統以卜筮之尙占遠近以天地之寬迫言幽深以形之隱顯言遠近者皆有幽深幽深者亦皆有遠近遠者其至前遲近者其至前急總未來之事物也幽者其形藏深者其藏厚總難見之事物也事物有遠而亦易見者有近而亦難見者論理者論現在事物之善惡與將來報應之利害趨避之宜否決疑者決其爲不爲未定之志也如乾初爻潛龍二三字是事物之善惡勿用二字是趨避而包利害知來物頂以言說則知是知此然既知此則用不用之意可決善惡在心中之謂然未敢自信仍算未知又唯以詞言矣故言尙詞而尙占在其中也制器亦擬得箇事物

周易本義註卷五

三

之而後知也。受命如嚮而使人知遠近幽深是詞之事。詞之所以足爲人尙者在有此事故曰尙。詞之事至精是詞之道非天下二句是因其事而推見其道。道者事之蘊事者道之發道不可見只于事推見之也。精兼詳精透非精詳則不能與人無不知非精透則不能與人遂知。有意而未有迹有端而未竟其緒皆非精透如此者人須由意擬迹因端推緒而後知之明。是不能遂知也。此指上文與人無不知及與人遂知。

參伍以變錯綜其數通其變遂成天地之文極其數遂定天下之象非天下之至變其孰能與於此。

此節除文象二句皆言變也但言變處未言尙之義。言象處則言尙之義故註曰此尙象之事。曰尙象之事非曰象之事也。言變處是溯象之始言之變以能動爲可制器之象足爲人尙今言象由變成而可以制器即是言變能動可爲制器之象矣故言尙象而尙變在其中。參伍者每變之兩擇所餘在第一變左一則右必三左二則右亦二左一則右必一左四則右亦四在第二第三變左一則右必二左二則右必一左三則右必四左四則右必三左之多少可以明右右之多少可以明左如幾箇三可以考幾五幾箇五可以考幾三也。

總取彼此相發覺之意有左右乃有參伍參伍以變猶云左右揲以爲變也揲者每變未算參伍謂使著兩行而似相證明非謂人覈其數也掛一所以去揲之板定不平亦爲揲計總當揲事則亦總在參伍中錯者取三變之餘策先分在三小刻者會爲一變處是彼此相交相互也綜者將交互者總數其多少而將向一變之或五或九二變三變之或四或八者而結以總數也每變之合一掛兩劫置于一小刻已是錯但未計其五九四八則未綜也漢詔有四租挈挈者約數也綜是織事之名總時沒了眾數猶織之掣眾絲而低之也總後舉出一多數猶織之放眾絲而昂之也句是筮之事下四句是事之回數自掛一以至計三二句變之歸奇揲之事止矣變通句頂參伍言通變卽三回參伍也一掛二劫之後一變止矣又如前掛劫使不止于一變而又爲一變是疏其止而使之行也通疏通也通窮于三故言通卽言三也通窮于三者三變之後歸奇之多者至二十五策所餘者二十四策兩四營後歸奇多者十七策所餘止七策不足復營是不能爲三變而止二變又不能成交與無變無異是三變之後變必止不可通故通窮于三也以爻紀三變則可知一卦是十八變也成天地之文者成十三十七二十十五之數卽成七八九六之數成七八九六之

數卽成二老二少之象也。天地卽陰陽分之爲老少，合之總陰陽也。文儀采也。陰陽不可見而呈見于畫，猶人心之呈現于儀采也。事物分之爲形色，形色合之爲事物，故一畫只言文六畫方言象象者似一事物也。錯綜在通變後事數已在成文內可稽其何文也。極數是六回錯綜可知以爻計則是一回錯綜也。蓍之變無盡，則數亦無盡。但筮者所求蓍中之數，則以六段爲限。極數者，極蓍之筮者所求之數耳。一回錯綜得一段數，六回錯綜得盡六段數，是爲極。五行交爲萬物，八卦二氣之交也。重之五行之交也。故六畫而後象定。氣到動極時，則復靜有消而已無復進也。而氣動之極，以質之足爲候，故文之成只言成象之成，卽言定天下。猶云萬事萬物之該博也。至變兼對待流行言流行之變不已，故能定象對待之變無窮，故能定天下之象。此句只預定象言，成文以前未足見至變也。定象以上皆變之事，而觀及其終，乃見其有至變之道。

易无思也，无爲也，寂然不動，感而遂通天下之故，非天下之至神，其孰能與於此？

遂通天下之故卽上文遂知來物遂定天下之象是已見之義此節又揭出其出于无思无爲以見其誠也。凡事出于虛公者乃誠无思无爲虛公也思爲者因欲以己意行于物于是未見物之當示以何象何物而先思想以何象何詞示故作爲以何象何詞示也是如此則非眞當示以此而不容已所謂不誠也如是則其所示者亦於物無當矣變象詞占是理之條目此是理之本原人能學此則不待求之易而道顯行神矣是變象詞占之顯道神行有盡而此之顯道神行無窮也用變象詞占是眾人之學學此是君子之學故夫子必說此節著不必出于此數此詞隨人之所揲而出不必于此无思无爲也人之所揲感也揲必有所出此如明德之具眾理隨事物之來皆有以應之也然總由揲得是實人之自爲猶明德應事物之理皆事物之使然也是謂至誠无妄數詞相連詞之无思爲總在數之无思爲數詞與常揲之事物未必恰中不過應揲之感耳然數詞可以推類旁達則但應揲之感而卽已應事事物之感矣通天下之故若講作直應事物之感便不切實常言神皆取虛而靈之義此節只重无思无爲只重虛義謂至精之變道之靈然靈有未必出于虛者此則出于虛獨靈未可云神虛而靈則可言神矣神不外極靈之義但靈不出于虛則靈而不誠似靈非真

靈且亦不能極靈必虛而靈乃可言神總之真靈極靈乃可言神耳非虛則不能絕思爲故由无思爲可見虛神是體精變是用神是无方之神精變是无體之易天下之故卽上文來物天下之象本是新出而謂之日故者未有天地先有此理之義也

夫易聖人之所以極深而研幾也

此二節總結上三節上三節言通志成務不疾不行想必是精變神此二節言確是精變神故能遂知遂定无思无爲也聖人之所以極深研幾者精變神之道也言聖人之所以極深研幾猶云聖人之精變神易與精變神爲體可直作精變神看故不曰易有聖人之所以極深研幾而直曰易聖人之所以極深研幾猶云易書也著也而從其道而言之則是精變神而已非以神爲體不能精變言至精至變而至神卽在其中故此節只言精變而下節卽并承之以神事物之善惡報應藏在事物中如詞之義藏在象中故曰深事物之未形在事物先而微猶象之未形在象先而微故曰幾極者先有所見而探進去也研者先無所見而磨出來是研者從無造有凡知所未知皆是

唯深也故能通天下之志唯幾也故能成天下之務唯神
也故不疾而速不行而至

心見象而入而不能徹象之蘊是中道而遇塞也通者
去其塞也成功在有具具在預設不先知物之將至
則不能預設不設則無具故唯幾能成務易之變只
可定象成務須待詞占之通志然通志非通見幾之志
亦不能成務非有變之幾無從有見幾之志可通故通
志之成務總歸功于幾也速至卽通天下之故卽遂
知來物遂定天下之象未頂得第四節之義不疾不行
乃指无思无爲方是正頂第四節速至非神所獨能
不疾不行乃神能獨能通通之遂成之是速通之能
通成之能成是至速是其事之捷至是其事之就
人之辦事非有具不能速赴強速赴亦辦不得通成之
速至以至精至變爲之具也不疾不速卽无思无爲
惟意必固我之根盡除斯能絕意必固我之發意必固
我之根盡除則是太虛无方而神矣不論外无不神
而能至精至變之理即使能至精至變而亦不能不復
以思爲參之故精變已可見神至不疾不速則愈无
疑矣

子曰易有聖人之道四焉者此之謂也

此只申明首句之言確猶云向云如此乃實事之詞也有聖人之道是明易之尊以誘人尊易之詞申明其詞之確欲人無疑于尊易也

第十一章

此章又將上章之事并其所由來與其實際言之以益見其事之尊也開物成務卽上章所言無進一層意聖人以通天下之志至神明其德夫是言其所由來闡戶之謂坤至生大業是其實際章意止此後三節只文字波瀾總不過反覆提撕此意耳通章文字是贊贊體首節自易之功用溯到作易第二節至莫大乎蓍龜自作易推到易之功用末二節又承易之功用溯到作易

子曰夫易何爲者也夫易開物成務冒天下之道如斯而已者也是故聖人以通天下之志以定天下之業以斷天下之疑

此節并言易之功用與聖人作易之意通章之意略盡
於此亦不以之通志定業此是故二字義知易在明天道能前民
用而有通志成務在目中矣又察民故則知志待於通務待於成而不能不用易以通之成之矣下面明天道
節正疏明此以字之蘊易單指著不兼書開物卽
通物之志開是功夫通是效驗如路有梗塞鋤去其梗
塞是開無了梗塞便是通也成務卽成物之業業事
也自其爲物之所當務言則爲務成之爲成已成爲定
天下盡物之詞也開物者使之識道成務者使之
道冒天下之道則無不能開成也而已矣不是僅
上章不疾不行結果只是
如斯之詞是必如斯之詞
通志成務非另於物有加之事故開物成務卽該盡上
章成務卽以開物成是一事之始卒非兩事物之
不知者是不能自開成使之知是開成物之知而疑者
猶之不知亦猶之不能自開成使之不疑亦是開成二
句有斷疑在中故下文并承以斷疑通志定業就不
能知者言斷疑就已能知者言斷疑句謂有一種人
似無待于開成而聖人亦以易開成之者蓋斷其疑也此句見作卜筮不獨爲凡民

是故蓍之德圓而神卦之德方以知六爻之義易以貢聖人以此洗心退藏於密吉凶與民同患神以知來知以藏往其孰能與於此哉古之聰明叡知神武而不殺者夫

二字言是承聖人三句紬繹其事而言之此節頂聖人二字言是故二字統管二節是字乃紬繹上事而後指之而言其蘊也故字是意中見箇易尊之故故字下有易之所由來甚尊句在下文乃陳上事之蘊以明所以尊也口氣似云易爲聖人所作如是故易之所由來甚尊矣何也所謂聖人者非常人也蓋蓍卦爻之善如此而所謂聖人者乃以此洗心而能藏密知來藏往者也寫聖人之德止於藏往後二句則實指其人也蓍未揲則爲蓍揲之終則有卦爻蓍卦爻卽取筮事以言神變精也蓍本體也圓神本體之體段也卦爻發用也方智易貢發用之體段也有變而後有象有象卽有詞占卦爻以象該變詞占也有蓍終先看卦而後看爻以爻在後以筮終之序言也圓神卽上章至神方智易貢卽上章至變至精蓍草也卦畫也材質也圓利轉也蓍未見利轉之形而其不先爲一數含于其中者德也圓方者德之形制神智者德之

而具羣數亦不能爲羣數有利轉之理也。先爲數不能爲羣數不具至靈能動不窮非神不能圓故圓者必是神。唯靈能動唯之迹无是迹不成是物圓而神者以圓而成箇神德也。惟定理只是理有之謂德有之者心也。故曰方知謂心有定理理到定时四顧不見缺陷猶方之均平亦不受增損改移猶方之善止故定理曰方理方則有之者亦方矣故有定理之德亦曰方。卦卽是象而筮初畢時未及研求則象仍隱于中徒見是畫耳。卦之中卦之心也中有定象卽心有定理也。天下之事物皆有象是事物之象則亦理也。智之明也唯能見定理爲有之于心唯至明能見定理故方可成箇智德。定理爲者成就之理非一理也有合眾理爲一理之理有一理爲眾理之理而皆成就也。易者卽方者非先方而今易之但卦尙有之在中而爻則發出來耳。卦原積爻而成則卦在卽易以貢矣何以另屬之爻蓋筮者初成時未見卦中之義及細審畫之陰陽老少而後卦中之義出現遂似卦只含此義以爲德而爻乃出以示人義卽定理有之於中則爲德發之於外則爲義有之於中未實見有義發之於外乃實見有義也有中斯卦外有六爻之義乃見卦之實德。易者爻與爻合而卦之義別此爻有與彼爻之義別變動不拘也。以此

洗心謂以心合此使其私意私欲无所容也
父之體體至神故用至變至精三句總一貫事聖人以
三者洗心總以神洗心耳洗心者去其私意私欲之
蔽累以還其太虛也如此則只宜以神不宜以智易并
以智易者安身以崇德之義也尊德性以致中是以
神洗心道問學以致和是以智易洗心洗心以上爲
一截是功夫退藏四句爲一截是效驗退藏於密已
洗之心之存也非已洗之心則靜之不能虛密者虛而
不可見聞也吉凶與民同患有感也與同以分言不
以情言民以事屬我則我分當與之同慮其吉凶也
知來藏往已洗之心之發也非已洗之心則感不能通
知藏者感遂通天下之故也神是圓神之神卽藏密
之心也知來卽是智智卽承知來言自事物言之
則爲來自心之應物言之則爲往二句串說謂先以
神物之故而知事物將來之理以成智後卽以此智應事
神則患之亦不能知孰能二句自己釋明所稱聖人
是伏羲非不知其人而懸擬之也猶云吾所謂聖人
非他人乃伏羲也試思此等事他人不能唯伏羲能之
吾豈得于伏羲外有所稱哉所以說此兩句者以此
武不殺傳於世可以爲此之徵有微則信也伏羲之聰明睿智神頂

退藏四句
殺之可信古則天地之氣蓄而未洩宜其隆厚可生人也
殺是治術是藏密神智之效驗效驗莫明於作易然不
易之妙人不能知唯治功之妙人所能知故爲眾人舉
效驗必舉此也神武不殺譬其不憑常迹以爲治術
非比未卜筮而知吉凶知來藏往則不必憑常迹而
能創爲治術矣用殺爲武是常人之武不用殺而別
有所以爲武是神明不測之武也言其武是神武而
不用殺也治術至神武而盡此是舉邊際以該全體

是以明於天之道而察於民之故是與神物以前民用聖人以此齋戒以神明其德夫

此節頂以通天下之志三句言首節言聖人預見易
是前民用之神物故卽興之以前民用此則補出所以
預見與一見卽興之故通節口氣總言由聖人有神
智之德於是作爲易神智則必明察明察則必興神
物此理勢之自然聖人亦有所不自知也天地事物
與其善惡吉凶皆天道明者知其皆二氣變化之所爲

又知二氣變化是神之所爲也。明是明其不外蓍中之數是反約之意非詳博之意。民故有善惡有吉凶其現在是天道善惡吉凶有可轉移之理其轉移不轉移有智愚不等之由此又隱于天道中者知之比知天道力費而事精故曰察。知神物之可興謂知蓍龜可以興起之爲神物也。蓍龜之德本神但未用以卜筮則神不見于世及用以卜筮方見譬如帝王本是帝王之器亦有人扶進在位方成帝王也。定天下之象爲智智之體爲神知天道不外奇偶之數故知蓍龜含奇偶之數在中是天下之象之體知是定天下之象之體故知可以出其定天下之象之用而使人見其爲定天下之象之體也。人之善惡吉凶雖命之自天然既分形爲人則善惡可以自主吉凶待善惡而加善惡可以自主則吉凶亦可以趨避但民之愚不能知善惡卽不能知吉凶不能知遷改趨避也知此則見我于善惡吉凶非不可奈何亦非可以无事合之是有不可不先之理不可不以己之理言也。趨避是用之吉凶者遷改是用之善惡者前民用者以此用導民使有此用也龜只示人以事物之象未曾示人以事物何況善惡吉吉當趨凶當避反惡爲善推善爲善亦民之所能知也所不能知者善惡吉凶前之只在示以善惡吉凶蓍龜只示人以事物之象人得憑以推出善惡吉凶民安能知但示以象則卜人筮人得憑以推出善惡吉

吉凶而告人卽算示民以善惡吉凶矣
占之書當是立智者爲卜人筮人使民欲卜筮則請之
代己也 節意至前民用止聖人句另言前用是前无
可議之用是註釋上文之詞非正段文字下文只接上
句出 神物所前之用聖人亦欲其前已則是無可議
之用也 猶云所謂前用是前无可議之用也 前用皆
可生業前无可議之用故可生大業大不獨多亦是至
善至吉也 神明其德只是知未來无可議之用 趨
避非聖人之志而遷改亦聖人之志吉凶聖人所不期
知唯善惡乃聖人所期知也 知善惡于未來而又知善
惡之精微聖人所謂神明也 聖人不必卜筮而神明
然卜筮可以神明則聖人不必不推讓卜筮也 神明
意總言知來而知來卽有往可藏
故不單言神兼言神明明卽智之義

是故闔戶謂之坤闢戶謂之乾一闔一闢謂之變往來不
窮謂之通見乃謂之象形乃謂之器制而用之謂之法利
用出入民咸用之謂之神

上二節言易所由來下二節言易之功用此節是過渡
文字 通節口氣言由聖人作爲卜筮以教人于是天

下有卜筮之事 通章專言筮卜是以其同類而帶言之耳此節只是筮事 闡闢變通象器是其事之條目法神則其事之意趣也 初之四十九策一處及每營之後總言過揲之策及分二之未揲皆闡也掛一分二揲四皆闡也 闡時去了前數闡更爲後數是變也 凡之謂是核實之詞其名先有凡謂之是評品之詞其名後出各句不得先提末一字 往來謂前變已往後變復來不窮專指有來非兼言 往之多也 往而无來則止矣後有來則是不止也 上段言四營之事此段言三變之事 見者但與人以有所見而未與人見爲何物也形者全見成體使人見爲何物也象者彷彿以物而非有物也器者實有物也 見亦非无物但人未辨爲何物則似无物也 上二段是人所爲之事此二段是著自爲之事人只以著爲變通未嘗以著爲何見何形之變通也故筮是一路以人爲聽命于鬼神也 節通就天下後世之筮言其所用之事是法而其用神兩段字文有拗反之勢言此筮雖是用法而却不是全何段是強則似非用法也 制而用之謂制非此事而用之於民原其所起言之也 凡聖人修道以教人之事皆謂之法筮亦修道以教人之故事則亦是法也 咸用是用法也 用法而爲其事則爲時不无勉強无所勉強出入咸用是神爲身家以內事是入爲是

身家以外事是出
懼喜用之也 卜筮謂先有用之於出入而利者故民
又所以導民之用卜筮也 此用字與上節用字不同
上節是體用之用指遷改趨避此用是用舍之用指用
易言 凡人之所謂矯性者待勉強率性者不待勉強
而人之所同者唯性唯率性則能同矯性則无同之本
而不能同言咸猶吾率性言率性循言自然也 用利
用者是民之性以利用者導之則民用之之性自行與
別事導民者導之之外又挾驅使之勢迫人之強用者
不同 凡人自然之事是神則此用筮是自然之事亦
是神也 神者人心之靈其中所具之理爲性是性卽
是神非性卽非神自然之事性之發卽神之發故歸本
而名之曰神 三句總就筮中指點出利出入以見前
民之足以濟民所以前民者眞是神物宜聖人之必興
神物以前民用也 唯利用出入故能使民神民之神
在筮時見則利用出入并見其上而可得而言矣 三句
大意謂筮之事不獨變通象器而又有利用出入以致
民之神在其間也 神卽上文神字人得之則爲性

是故易有大極是生兩儀兩儀生四象四象生八卦

二節言卜筮之功用 功用到生大業始是正面以上
皆其漸也 此節言有筮於是又有畫 兩儀四象言久

八卦言卦 凡變易交易之物事皆是易下文爻卦亦是易有太極謂爻卦先有其理也 通節總云爻卦先有其理至筮後則發現而爲爻卦 太極無時不有非因筮方有但因筮方發現而爲爻卦耳 兩儀四象以一變通之一畫言一變通則得一畫其畫非陰則陽凡已分陰陽卽名兩儀非必兩畫也其畫之陰陽非老測少凡分老少卽是四象非必四畫也筮者畫卦之數一生二二生三積以至六无二生四四生八之事但其畫之所以有陰陽老少則從此數得來如或畫一畫陰以別陽或畫一畫陽以別陰因有一生二之數故得如是分陰陽也其一畫又或老以別少或少以別老因有二生四之數故得如是分老少也推之摩盪而爲八卦皆此理也 筮者只得一卦或兩卦言八卦者不定爲何卦也 筮者得重卦乃爲大成言八卦者六十四卦不外八卦之重也

八卦定吉凶吉凶生大業

此節言有畫于是有占有占有于是有大業 入卦句本言卦生吉凶之詞然不直言生而言所以生言所以生詞者現成詞無所增損矯揉也因詞出于人與卦以上出于鬼神恐人疑有不符也 六畫以前猶經營象而

未成似凝議吉凶一般至象成而後定奪也
卦中所含之理詞之吉凶在言後見下句吉凶則就詞
言也大兼以量大以理大合天下咸用之業是量大
其業皆是中正精粹之業是理大初之利用出入已
有業但視咸用之業尙少理
大而量未大亦未可稱大也

是故法象莫大乎天地變通莫大乎四時縣象著明莫大
乎日月崇高莫大乎富貴備物致用立成器以爲天下利
莫大乎聖人探赜索隱鉤深致遠以定天下之吉凶成天
下之亹亹者莫大乎蓍龜

此節承上文卜筮之功用以贊其獨尊上文單就卜
筮之功用言此節就卜筮之功用較天下之功用言
聖人以上皆是比興正意總在末一段言天下事物皆
同類中有特尊而功用則以蓍龜之功用爲特尊也
日月以上言物富貴以上言人物總陰陽之氣耳故
言陰陽總是言物法象卽第五章成象效法輕清爲
象重濁爲法象爲陽法爲陰言法象卽言陰陽也萬物
之陰陽皆分天地之一故莫大乎天地此句言對待

之陰陽通變句言流行之陰陽四時是天地之流行
明陰陽之發用物之及物處爲發用莫大于天地縣象句言
明大于著明則大于一切發用不待言矣上二句直言大於日月之著明
著明則大於一切之著明不待言矣上二句直言大於縣象之著明
一切此句以大于一類言大于一切總言發用莫
日月直言發用不明必須如此言之此所謂文法
卽上文象字象在上者故曰縣凡物之聲色皆發
此及乎彼而皆不如光之遠富貴句言人之體統發
人句言人之德業人之分大小不外此兩項无不有統
子之謂富无不上之謂貴天子以下之稱富貴乃假名有
備物致用立成器是三項事物是現成可利天下履帝位名有
下者則致用立成器是三項事物是現成可利天下須推致出其用方利天
利則如半器而未完也成器則化物而爲器決疑皆是半因其用方利天
天下莫大於備物致用立器之利而備物致用是事務給事給物可
立德未木物足以之及天類之天之聖于象之著明

之利闢關節是蓍龜之探索鉤致太極二節是蓍龜之中定成未來之理有萬在天地之間是蹟也今向萬理之中求取一理是探蹟也是未來之理則非于萬顯而于中尋一人也蹟已難分何况又是隱者隱已難認何況又亂以蹟此未來之理所以難知也探索是人去尋鉤致是尋出來深者未來之理與本事相通之脈絡微尋之幾無由則似沈沒了也遠者未來之理與本事相隔之層次多尋之費閑歷也探索是功夫鉤深是成功謂鉤出致到也未來之理有淺有深有鉤致不鉤致得也吉凶即深遠復有淺深鉤深致遠謂無鉤致即定之工夫定即明也探索至于鉤致則明矣業壘壘就矣趨避之勤成者原其始要其終也至要其終則天下二字只當人字未是盡人之詞有不能盡人者鉤致以定成者然皆有限不能遍天下唯蓍龜能遍天下家諭戶曉詩書禮政亦能及大不能及小能及智不能愚惟卜筮可以一時天下咸用可以萬世天下咸用可以莫大頂生大業來生大業頂咸用來聖人不能能及愚惟卜筮可以一時天下咸用可以

是故天生神物聖人則之天地變化聖人效之天垂象見吉凶聖人象之河出圖洛出書聖人則之

二節與首節聖人三句同意言易之功用如是故聖人必作之也二節之言是第三節興字之實際卽首節以字之實際亦覆中有補文法也上文易之功用是聖人作易後方有而聖人明天道則預知其有此察民故則知其有此而不能不用所以遂作易也首句卽興神物是綱以下頂闔戶三節事言是興之目變通含在著中卽象器畫詞皆含在著中一助之宣出使人知其爲具此之物乃所謂興神物也天地變化三段正言著之具變通象器是其天道所以爲神聖人之助宣此是助宣天道所以爲興神則是綱下文效象則是則之目則是卽其事而無改易效者以此物學彼物事是易其質象是有其彷彿是并易其狀發通是著之能效變化聖人作變通法是以效變化則著之能也餘句倣此圖書段言器之數形器以後以九四連六三連七二連八也二老二少之數此是則圖書之一連六

謂之成器然出老少而未顯聖人作爲以九六七八定老少之法是助成蓍之所宣也則圖書猶云以九六七八定老少也數無質在此在彼無所改易故亦言則以上是助宣其神此段及下節是助宣其神之用

易有四象所以示也繫辭焉所以告也定之以吉凶所以斷也

至老少既出則蓍神中之蘊盡宣矣然宣之而未明于人猶之未宣也故聖人又作爲畫卦係詞之法畫以象陰陽老少詞以解畫陰陽老少顯于數則畫亦含于數畫舍于數則詞亦含于數是象示詞告蓍中已并隱具此宣其神之用聖人之爲象示詞告亦助蓍宣其宣神之用也易有四象所以示也謂蓍欲示人以四象聖人制爲畫以使易有四象所以示蓍之所欲示也餘倣此易有二字卽五節之義四象二字則兩儀四象八卦之省文兩儀卽在四象中八卦又不外四象之積成總以四象爲體也則圖書之法立亦只使卜人筮人定老少于心中耳未曾與蓍者見也示謂以老少與筮者見老少兼卦之時義及乘承比應之位而善惡吉

凶以分示人以老少卽示人以善惡吉凶矣然到底是象觀象會意非凡民所能必直以詞告之始明定吉凶二句只申明係詞是定吉凶告是斷非又有一項因四象之成只有象陰陽老少乘承比應之形其善惡吉凶須推求始見恐人只知爲定陰陽老少乘承比應而未知爲定吉凶則亦謂詞只是言陰陽老少乘承比應之詞告只是告陰陽老少乘承比應故又釋以此句象本已定吉凶故詞卽是定之以吉凶告卽是斷人之趨避之字指象

第十二章

此章言易書之事總言易是盡意盡言盡利盡神之書以尊易也首節言作易之志是欲如此二節三節言易果能如此

後二節總結之

易曰自天祐之吉无不利子曰祐者助也天之所助者順也人之所助者信也履信思乎順又以尚賢也是以自天祐之吉无不利也

順以心言信以行言天能鑒隱故得天在兼心善人唯見顯故得人在兼行善非得天不用信得人不用順也于不衰也此是擬議出天之祐在上之順信與天統人而言人者天地之心也故思之天必統人

子曰書不盡言言不盡意然則聖人之意其不可見乎子曰聖人立象以盡意設卦以盡情偽繫辭焉以盡其言變而通之以盡利鼓之舞之以盡神

首三句是反起下文不盡言二句是凡書之通例然則句方屬易說謂以凡例推之則易亦當然也下文三句言易却不然見異于凡書也所未知之事物意皆及之而所未知之事物安能爲之言所以言不盡意也卽所已知之事物能爲之言者已多欲盡舉而筆之書亦日力不給所以書不盡言也總之書不能盡意耳聖人之意欲明天下古今事物之善惡吉凶及其遷改趨避之方于人以利之神之之意也盡者無不明卽無不便利不神而欲明欲利神之意無不伸也立象以盡意者有象則盡明利神皆有其具也盡意是繩盡情偽

盡言盡利盡神是目意欲明情僞盡情僞盡言則欲明之意盡矣意欲利人神人盡利盡神則欲利欲神之意盡矣立象以盡意謂以象爲盡意之具未是向意施盡之功夫設卦方是用此象方是盡之工夫也意之所以難盡者只難在全舉天下古今之善惡既全舉出善惡則因而明其吉凶及遷改趨避之方不難明了遷改趨避之方則變通鼓舞無另事矣象者通括事物之象故可以全舉事物之善惡故可以盡意單陰陽未成善惡入乎時義乘承比應之中而後有善惡故設卦乃可盡情僞事物有先定之理依此理爲真背此理爲僞情卽眞也情僞卽善惡也盡意不獨盡明情僞之意而盡一切意總以盡情僞盡情僞亦在言而言之能盡情僞總在有卦之盡善惡明則遷改之方可悟反惡斯爲善推善亦爲善也吉凶隨善惡而明則趨避之方可悟反所以凶則吉守所以吉則長吉也卦足以盡情僞卽是足以盡吉凶則盡卦而係之詞便是盡明事物之善惡吉凶及遷改趨避之方外無復可言是言已事物善惡吉凶及遷改趨避之方得卦之盡情僞則詞可爲盡明善惡吉凶及遷改趨避之方之意之言矣而又無不盡則明善惡吉凶及遷改趨避之方之意無不盡矣此意明則盡利神之意不須復有事矣書明善惡因明吉凶則人有趨避

之志因有遷改之志而反卽爲之明趨避遷改之方則人得以遂其趨避遷改之志而有其事且不獨有其事而懼忻踴躍以爲之矣所謂變通鼓舞也變而通之謂先變人而終通之變通是人之自爲而書有以使之然則是書變之通之也變通鼓舞卽以盡情僞盡言變通鼓舞又卽變通中之趣致變通鼓舞只在盡言後而無象以爲之案則人亦不見其出于陰陽之變化而不信故設卦亦有功焉變謂化裁是人心之運動出理來如蓍之變動出象來也通謂人之推行或遷或改皆是不窮于前事而又起後事如蓍之通不窮于前變又起後變也神謂人之變通無所勉強而自不容已如蓍之以神爲體能不疾而速不行而至也

乾坤其易之緼邪乾坤成列而易立乎其中矣乾坤毀則无以見易易不可見則乾坤或幾乎息矣

二節言書果能盡聖人之意卦能盡情僞詞能盡言盡情僞盡言卽能盡利盡神所謂能盡聖人之意卦詞之能盡利盡神實事總在盡情僞盡言詞之盡言功又總在卦之盡情僞故兩節謂之器以上總言卦之盡情僞而遂言盡利盡神至詞之盡言并省其文也似云聖人之作易爲盡意而起而易之旣作果能盡其意

也易之能盡意總由于象而象所以能盡意以其爲卦能盡情偽也夫象之爲卦如何以盡情偽乎蓋情偽者乾坤之易也乾坤是卽易所附以顯晦是乾坤者易之緼也而象卽乾坤是卽易所附以顯晦者也故象之所謂盡情偽者象設爲卦而成列而易立乎其中也是此乾坤與易不相離者也易不與乾坤離則乾坤毀卽無以見易矣乾坤與易不相離則易不可見必乾坤之息矣 緼者易之體虛得陰陽方襯託出來猶衣之有著衣隨之飽餒也 易是陰陽上面事除了陰陽安能獨見耶字是思維緼之肖否口氣非疑乾坤而未定也成列時仍是乾坤兩畫而各有所處之時位不同則各成一事物而變化不窮矣 易在乾坤中而人看出来時則是乾坤外又見一層故曰乾坤爲緼 成列首乾坤指天地間之陰陽以下方指象之陰陽 成列者有儕偶位置也 立如所立卓爾之立謂居然可見而非彷彿也 幾乎息謂人于成列之乾坤不見其威列而止見其乾坤則乾坤實不息而自息也 幾乎近似之謂言必人于乾坤有所不見也

上節言易與乾坤不相離形而上二句又寫其不相離
之狀總變文以承上節也是故二字總管全節全節
言卦盡情偽故書并能盡言盡利盡神是故二字是
上節看出卦盡情偽故書并能盡言盡利盡神之理而
之上又有層而形爲下層與凡天下之道器一樣是形而
之凡事物之理是道凡事物之迹是器二字是比例不
是專指書之易與乾坤而凡天下之道器亦不外易與
乾坤也上文立乎乾坤之中者本指事物然實無事
物之迹只其理而已平日從事物見此理則事物爲之器也
惡器今從乾坤見此理則乾坤又爲之器也事物兼善
惡則其理亦兼善惡何以皆謂之道其惡者初亦本善
惡也故可以施遷改善趨避二氣雖有清濁而隨分自
無不是善但爲外物所激所誘不能如其分乃有不善
耳觀百姓之日用不知其初亦是繼善成性可見
惡隨地之氣無心人物有心而初無意同是虛而圓神本
惡所爲盡其後不能者喪其虛也象眞是事物之善而吉天能
而後人從而因而并遷改趨避之方者眞是斟酌善理眞是
天下裁推所裁而行之眞是通眞是變通而文道器不相離
利盡神而成事業故因上文

遂看出所以盡言盡利盡神之故而言之也
天下自然之理節節相生相別故謂之化一事一物之理是就
此大片中裁割一段出來如人之制衣一般故人之求
理曰因其自然之化而裁制之理即是化裁理則是
化而裁之但恐不是因其善惡而議真遷改之理則似
化裁而非真耳此句猶云真是化裁而可謂之變也下
二句倣此謂真是推化而行真是舉變通而措也利
之神之而遷改成矣故謂之事業上章變通就著之
衍天道說此就人之道說此就

是故夫象聖人有以見天下之躡而擬諸其形容象其物
宜是故謂之象聖人有以見天下之動而觀其會通以行
其典禮繫辭焉以斷其吉凶是故謂之爻

以下三節通結上文卽將上文覆斷一過此節結首
節是故二字總冒三節謂聖人作易之志與易之功
用皆可推求而見如是故其事爲天下顯白之事也
盡功夫變通二句又非另有功夫故此節只言設卦係
詞之事而前後三句皆該其中總起似云聖人立象

欲以爲盡意之具設卦係詞欲以爲盡意之事
是代設卦二句之詞猶云卦者聖人所設以盡情僞
卽所謂有以見天下之蹟云云也如此故謂之象也詞
者聖人所繫以盡言卽所謂有以觀天下之動云云也
如此故謂之爻也

天下二字是盡字之義餘義見第六章言後有頂變通鼓舞二句意省文者以有下節互文相足也講家當補出可云設卦欲以盡情僞係詞欲以盡言如此而變通鼓舞非于設卦係詞之外有事則盡利盡神非于盡情僞盡言外有事也故曰設卦係詞欲以爲盡意之事也

見只見其大凡無能見其詳實之理故言不能盡意而須立象以槩之

極天下之蹟者存乎卦鼓天下之動者存乎辭

以下二節結乾坤二節猶云用象以設卦因卦以係詞果能盡情僞盡言以能卽爲變通鼓舞而盡利盡神也

極天下句頂乾坤二節謂之器以上言卦能盡情僞
鼓天下句頂謂之器下化而裁之上中間无字句言詞
能盡言乾坤不相離而成道器是極天下之蹟存乎
此也卦能極天下之蹟則詞因此而係是能盡鼓天下
之動也盡字意亦見天下二字存謂已在此不必
他求亦莫如此不得他求也

蹟動切也。極鼓天下之蹟動存乎此者于天下之蹟動
該也。動卽上節動字猶事也。鼓者鼓其化裁推行以
去故卽新

化而裁之存乎變推而行之存乎通神而明之存乎其人
默而成之不言而信存乎德行

此節頂化而裁之三句言卦詞并能盡利盡神盡神卽
在盡利中頂變通則鼓舞在其中矣。是變通故舉措
之是事業頂變通則事業亦在其中矣。上二句正頂
化而裁之二句詞面神明三句補化裁二句未及之義
亦變通中事上二句言欲化裁推行易已有化裁推
行以與之而別爲化裁推行又莫如易所與之化裁推
行是人之化裁推行在乎易所與人之化裁推行也
變通者易導人化裁推行卽是變通通之也存乎變存
乎通猶云存乎易之導人以化裁推行耳。推行是推存
行所裁成者有化裁卽有推行有變卽有通化而裁之推
之謂得所可推行者而推而行之眞是化裁則其所得
之理准行以變人通人者自是因人之明成事非能直主其化

事但无易則无所可明終不得有化裁推行之事故終歸功于易耳蓋發明以盡利以盡神之言似迂而非迂也明者因象詞所示推而明乎化中那一段是所用之理也此是化裁椎行之樞紐根本神而明者以神而明之也神虛而圓今此所言明是因象詞推而明之非所无思无爲之虛圓明也言所明者是未來知來是出于神之事今能知來則亦若出於神也默而成明存乎德行是釋存乎人默而成不言而信總言能知方來而未有者合于神之知來是以謂之神而明也默而不言是屬外面之事而今却以言明者之心境心成就在心也信者見其理之不可易而無疑也存乎成默二句意別在成信不在此三字成者初見之時有言入則成有言之境無言入則成默境也不言卽默不言是屬外面之事而今却以言明者之心境心成就在心也信者見其理之不可易而無疑也存乎成德行謂存乎德行之不由人心體道爲德身體道爲行如是積功不已則亦如聖人之洗其心私欲淨而靈明生也象是事物之彷彿意思則詞因象係亦是事物之彷彿意思如此則事物已非所已示况其彷彿之示又或反示半示借示則善惡吉凶已在象詞之外而遷改趨避之理又在吉凶善惡外是明事物之善惡吉凶與明遷改趨避之理皆明易所未示者也必神明而後能變通何以能措之天下之民所以雖作書仍立

周易本義註卷之五

卜人筮人也 神而明者當能觀象而明無俟于言而猶未盡言而爲之書者聖人愛天下之至更爲神明者過備也

周易本義註卷之五

譚瑩玉生覆校